

校正韓汝慶先生朝邑縣志
陝西南山谷口考
秦氏三秦記
秦錄



秦

錄

沈憲孝 著

中
華
書
局

秦錄

明 嘉興沈思孝繼山著

關中多高原橫亘大者跨數邑小者亦數十里是亦東南岡阜之類但岡阜有起伏而原無起伏惟是自高而下牽連而來傾跌而去建瓴而落拾級而登非以四五丈不及黃泉非以數十丈方得水脈故其人羣者博大勁直而無委曲之態蓋關中土厚水深川中則土厚而水不深乃水出高原之巔人性之稟多與水推移也

南山謂終南山也。脈自大散關而度左渭右漢黑白兩龍江注之其東出者自武功太白牽連而至商洛皆是南山如太行在燕代隨處異名耳太白極高上有積雪盛夏不消諺云武功太白去天三百山下軍行鳴鼓角則疾風暴雨立至今乃爲盜據而窟之游人莫到使山靈受汙武功亦北連太白與之竝峙太華削成四方高五千仞自回心石以上仰臨四十里少華三峰副之終南面亘藍田整屋中對長安登者經樊川杜曲諺云城南韋杜去天尺五韋乃安石別業杜則岐公墅而孫牧增爲者二曲爲長安林泉花竹最勝今皆荒落自此入山走深谷大壑卽三四百里不能窮中多修道求仙人數百歲者雲水游入往往覓得之子午谷去城南百里路自南通北正對長安故名然止單人獨騎可行昔魏延請孔明出軍費妃飛騎進荔枝皆此

長安爲周秦漢隋唐所都。歷代位置。亦非一處。然皆不出五十里之外。周后稷封郤在蔡城。今爲武功縣。其後不啻失官。竄於戎狄。則慶陽有不窰城。公劉徙郃。緊郃州。太王遷岐。緊岐山。至文王遷豐。始近今長安之境。緊郃縣。豐水出其谷焉。靈臺基趾尙存。又東則爲鎬水。武王都鎬。緊與豐東西對峙。相去二十五里。名宗周也。諸家皆言漢武穿昆明池。鎬京故基淪入于池。秦始皇保西陲。至非子居大邱。當是畜牧之地。緊今興平。始皇改名廢邱。示周廢不復興也。孝公始作咸陽築冀闕而都焉。其地九鑿之南。渭水之北。山以南爲陽。水以北爲陽。故曰咸陽。然史記黃圖云。始皇都咸陽。引渭水貫都。以象天漢。橫橋南渡。以法宗牛。則是跨渭水而都之。漢長安城在龍首山上。周豐鎬之東北也。龍首來自樊川。其初由南向北行。至渭濱。乃始折而東。漢之未央。據其折東高處爲基。故宮基直出長安城上。建章。昆明皆在原西。而秦長樂離宮。漢修之。亦東西峙焉。其後以居母后。名東朝。三秦記曰。此山長六十里。頭入渭水。尾達樊川。頭高二十丈。尾低可六七丈。色赤。漢旣據其上。立未央宮矣。而山勢尙東趨。唐大明宮又據其趨東之壘。故含元正殿高平地四十尺也。若此山方北行未東之時。垂波東下。爲龍首原。原有六坡。象易乾卦。隋包六坡爲郃城。大興宮殿。據第二坡。應第二爻。唐建都因隋無改。止易宮名太極。至高宗風痺。惡太極下溼。遂遷據東北山上。別爲大明宮。至山勢盡處。引水以爲蓬萊山池。因名。大興爲西內。大明爲東內。又於別建興慶宮爲南內。此五代都長安大略也。咸陽有三秦城。在本朝縣東三十里。隋城在縣東北二十里。唐城在渭水北杜郵館西。鎬京東逕砥石門。乃阿房之西門。名卻口門。裏以吸口。

人隱刃。正在鎬水入渭之處。漢都長安。其城在渭之南。而秦咸陽之東南也。故項羽自霸上而入秦都。皆曰西上咸陽也。隋都亦在長安。實漢城東南十三里。今西安府坐龍首山南十里。未央東南十四里。則今城正當大興舊址。

長安宮殿。惟秦漢最盛。想當時秦製大木多。取用不盡。若今嘉靖開午門三殿災。萬歷開慈寧乾清興。動費四五百萬金。府庫不足。取之事例不足。又取之捐俸不足。又取之開礦。一木之費。輒至千金。川貴山中。存者亦罕。千溪萬壑。出水爲難。即欲效秦漢百一未能也。始舉兩朝雄略。秦始皇所造宮室。多在渭北。每破侯國。即放寫其宮室。作之咸陽北坂上。以所得美人充之。起咸陽而西至雍。規恢三百里。離宮別館。彌山跨谷。複道相屬。鐘鼓帷帳。不移而具。又三十五年。別度渭南立上林苑。中建阿房宮。東西五十步。南北五十丈。上可坐萬人。下建五丈旗。車行酒騎行炙。記其繇耳。則開道八十里。直抵驪山。表南山之闕以爲棗。絡樊川爲池。以木闌爲梁。以磁石爲門。度魏象太極閣道抵營室也。其他黃陽。棧楊。平陽。橐泉。長楊。祈年諸宮。不暇殫舉。漢修長樂。周二十里。又起未央宮。周二十八里。前殿東西五百尺。深百五十丈。高三百五十尺。至孝武以黃金爲壁帶。文杏爲檼柱。金鋪玉戶。華棧壁璫。雕鏤玉飾。青鎖丹墀。又作建章宮於宮西。跨城作飛閣。構簷道以上下。爲千門萬戶。前殿下視未央。別作鳳闕。對峙并幹。樓閣俱高五十丈。簷道相屬焉。而左鳳闕。北員闕。則高皆半之。甘泉宮周十九里。去長安三百里。望見長安。他如集靈。五柞。回中。北宮。長信。不暇殫舉。黃圖曰。秦北至九壘。南至鄠杜。東至河西。西至汧渭。

之交。東西八百里。南北四百里。離宮三百。相望聯屬。木衣綈繡。土被朱紫。宮人不移樂。不改懸。窮年靡歸。猶不能徧。漢幾千里。內外宮館一百四十五所。

長安稱關中。蓋東有函關。西有散關。南有武關。北有蕭關。而長安居其中。其他如大震關之在隴右。瓦亭關之在固原。駱谷關之在整屋。子午關之在南山。蒲津關之在同州。豹頭關之在漢中。設險守國。皆在名義之內。

余偕叔祥遊鴈塔。問曩時曲江。皆云相去僅一舍許。今遺跡第若溝渠。中又無水。荒煙野草。一望無際。所謂江頭宮殿鎖千門者。無復可求矣。訊之故老。亦不究所以。比聞賈氏談錄云。天祐初。因大風雨。波濤震湧。累日不止。一夕無故而水盡竭。自後宮闕咸荆棘矣。今爲耕民蓄作陂塘。資澆灌之用。每至清明。都人士女猶有泛舟宴賞於其閒者。觀此則桑田滄海。當自不虛。若今日卽泛舟之處。亦爲子虛烏有。誰能問天寶全勝日耶。

陝田土二十九萬二千九百二十三頃八十五畝零。夏秋二稅。共一百九十二萬九千五十七石。絲繭三百六斤。絹九千二百二十一疋。絳花絨一萬七千二百八斤。布一十二萬八千七百九十二匹。行太僕苑監所屬馬。共五萬七千七百餘匹。洮州、河州、西寧三茶馬司。課茶五萬一千三百八十四斤。漢中府屬及四川保寧府屬茶課。易番馬四千八百餘匹。

稅課魚課鈔共一百七十四萬五千五百二十六貫九百七十文零。又小麥二千四百九十三石四斗。額徵工部四司銀一萬二千九百七十兩零。

陝西鹽課司。

領鹽州一司。澤州、西和、二鹽井、靈州、延安、河州。

計行鹽。

額辦鹽小引五萬九千三百三十七引。課三萬

八百五十五兩。

西漳二井額鹽七十一萬二千六百六十八斤。該銀二千五十九兩內徑解。留夏年例銀一萬三千二百兩。

十二兩。延綏年例銀一萬三千七百十四兩。帶承軍門。稿賞銀七千一百二十兩。固原客兵銀二千五十九兩。

始皇陵倚驪山下。作者刑徒數萬。雖其璧玉爲星辰。水銀爲江河。金帛機械無所不備。業已下錮三泉。然

登陵望之。正當渭水反弓之處。卽以堪輿論。固當二世而已。

陝惟西安鳳翔二府深藏三窟。自西北汧隴一窟。沿邊城二窟。外各鎮三窟。三代前以王畿求中。則居鳳

翔。秦漢後欲就四方。則居西安。自古入關有三道。一自河北入爲正道。項羽、漢光武、安祿山。一自河南

入爲間道。漢高祖、桓溫、檀道濟、劉裕。一自蜀入爲險道。漢高祖、諸葛亮、關中雖號天險。豈無可入之道。

第不比他戰場可長驅而進耳。

自秦入蜀有三谷四棧道。三谷者。其西南曰褒谷。南曰略谷。從洋入。東南曰斜谷。從郿入。其所從皆殊。舊

志謂略谷、褒谷同一谷。褒谷、斜谷同一谷。非是。其棧道有四出。從成、和、階、文出者爲沓中陰平道。鄧艾

伐蜀由之。從兩當出者爲故道。漢高帝攻陳倉由之。從褒、鳳出者爲今連雲棧道。漢王之南鄭由之。從

城固、洋縣出者爲斜路道。武侯屯渭上由之。此四道三谷者。關南之險阨。攻取所從來固矣。語見何仲

默三秦志中。然志稱同一谷者。謂製城谷北口曰斜。南口曰褒。洋縣谷南口曰儻。北口曰駱。

華山與長河會處在瀧關。然河之南。須得河南府新安。河之北。須得山西平陽府。平陽南有東烏嶺。北有

冷泉關。蓋河之南無新安。則由沙湖可渡河至蒲州。河之北無平陽。則由烏嶺冷泉入平陽。至蒲州。至

龍門。兩岸平廣可渡者百里。故在古人。秦有函關。陝西統平陽也。

延慶平涼民悍勇。若邊患。臨邛鄰接羌番。鳳河復多回棧。幸羌人仰茶利。閉關絕市。可制死命。然河套失

守。莊浪奔地。三邊縣隔。

南山東西。通接商洛。汝鄧。漢鳳。襄河。山深谷密。縣亘數千里。內多巖洞。盜易潛匿。宜預搜索。

靈韋寧夏之接蘭州。河洮之接古浪。涼州之接上郡。北地安定三郡。土廣人稀。饒穀多蓄。

關中郡邑最遠者。如鞏昌府。成縣去府東南六百里。兩當縣去府東五百六十里。階州去府南八百里。皆

白馬氏所居武都故地。延安府。葭州去府六百里。神木縣去府九百里。府谷去府東北一百里。皆關

環河套之內。

余行漢中。過禹廟。問漢源。因見大安河自略陽來。其流尤大。不知當時何以表漢源也。心疑之。及讀丹

鉛總錄。始知有東西漢焉。今引而記之。總錄祝穆曰。天下之大川。以漢名者二。班固謂之東漢。西漢。而

黎州之漢水源於飛越嶺者。不與焉。固之所謂東漢。則禹貢之導漾。自嶓冢山逕梁洋。金房均襄鄧。復

至漢陽入江者也。西漢。則蘇代所謂漢中之甲。輕舟出於巴。乘夏水下漢。四日而至五瀾者。其源出於

西河州微外。經階。洩。與嘉陵水合。俗謂之西漢。又經大安。利劍果合。與浩水合。入於江。

藍田關即秦曉關。國七賢過關者卽此。蓋是春雷初霽。張說。張九齡。李頎。李白。鄭虔。孟浩然共訪輞川王維也。當時鄭廣文自爲圖。有詩曰。二李才名壓二張。歸鞭遙指孟襄陽。

澄城縣山崩。初爲一山。至是東西分馳三四里。遺播平陷。良爲一奇。此嘉靖丁未六月也。唐武后臨潼縣因風雷湧出一山。初高六尺。漸高至二丈。因名慶山。以此知古稱穀洛水關。信乎不謬。宋紹興十四年亦有樂平水關。有司奏言。河衝里田。水中類爲物所吸。聚爲一直行。高平地數尺。不假堤防。而水自行。里南程氏家井水溢。亦高數尺。天矯如長虹。聲如雷。穿壁破樓。二水關於杉墩。且前且卻。十餘刻乃解。正德中又有文安縣水忽僵立。是日天大寒。遂凍爲冰柱。高五丈。四圍亦如之。中空而傍有穴。後數日流賊過。人多避其中。山川且然。況人物乎。以是知造物之奇。無所不有。

慶陽緣邊人善織術。有爲稻田壘者。能使其人腹中有土一塊。中出稻芒。穿腸而死。樹壘者。則出樹枝接勝。是亦挑生之類。然則是術不獨粵中有之。

寶雞以西。蓋屋成以板。用石壓之。小戎曰。在其板屋。自古西戎之俗然也。此地流渠走水。依稀江南。在關中稱沃土。

自古稱棧道險。今殊不然。屢年修砌。可竝行二轎四馬。其褒斜二谷。俯黑龍江。咸乾礮亂石。不知漠曠湯何以欲轉漕於渭。豈古今陵谷星淵至是其站皆軍夫以百兵爲廢置。是軍無餽庫。惟自種山田數畝。

而已。今軍日消而往來之絡繹如故。是宜有以處之。入川如秋林。富村。古店諸站。丁廬而富。其氣象又與漢中別。

會寧鮮流水源泉。土厚脈沈。泥淖斥鹵。卽鑿井極深。亦不能寒冽。居民夏惟儲雨水。冬惟窖雪水而飲。峨眉太極頂上無水亦然。

大隴首山牽連六七百里。其上多鸛鵒。行人過此。困頓欲絕。故樂府曰。隴頭流水。鳴聲嗚咽。遙望秦川。肝腸斷絕。崆峒山有元鶴洞。深無底。中有三元鶴。時出飛翔雲際。遊者見之。以爲瑞。鳥鼠同穴山則飛走相爲牝牡。此最異事。鳥曰鯨。鼠曰驪。

無定河。河名也。此地浮沙善陷。與人急走急換足。不則陷矣。故名。

甘涼處原中國地。晉涼州志云。周衰。其地爲狄。後匈奴使休屠渾邪等王。王月支。以地降漢。漢置張掖。酒泉。燉煌。武威。金城。謂之河西五郡。南隔距羌。而斷匈奴右臂。以通西域。故張騫通三十六國。班超復定五十餘國。條支安息。至於海濱四萬里外。魏晉後通者不過二三國耳。古燉煌。今嘉峪外地也。卽晉之西海郡。居延等縣。元爲亦集乃城。蓋在肅州東北五百里。瓜州蓋在今肅州衛西五百里。卽古西戎地。漢爲玉門關。沙州城蓋在衛西八百里。漢月支地。漢又有龍勒縣。卽壽昌地。亦卽唐陽關。西北去又數百里。爲伊州桑遠縣。又西去數百里。爲蒲昌縣。又北去數百里。爲唐安西府交河縣。其地又遠。而太宗所置伊西庭州。高宗所置龜茲于闐四鎮。總之在玉門之外。而天寶以後。河西隴右始陷吐蕃耳。本朝

守嘉峪。棄玉門以外。大都甘州西去五百里。爲肅州。漢酒泉郡。肅州不及百里。卽嘉峪。若河西諸郡。皆在甘州行都司之內。甘州卽漢張掖。如甘州東北百二十里。爲山丹。亦張掖地。東五百里。爲鎮番。東南三百里。爲永昌。五百里。爲涼州。南九百里。爲莊浪。皆漢武威。東南一千三百里。爲西寧。乃古湟中。卽漢破羌縣。屬金城郡。古賢如張奐、張芝、索靖、索綝父子。咸燉煌人。

涼州稱涼者。以西北風氣最寒而名也。五六月白晝中如霰。體暖而下者。謂之明霜。

河套雖古朔方之地。但漢唐宋棄之已久。起寧夏至黃甫川。黃河北邊二千五百里。卽南。自川至定邊。亦一千三百里。以開徑求之。當得縱橫各一千二百里餘。其中皆蕪野荒原。惟鹵可就水草住牧。安得中國人居之。卽遷人實之。從何得室廬耕作。所謂得其地不足田。得其人不足守。幸而會議不成耳。卽成。我國家金錢數百萬。取之終亦必棄。爲鹵復得。惟是銑出身任事之臣。一旦爲奸臣所構陷。身首異處。不能不令志士髮上指冠也。

固原本稱腹裏。宏治中。因火節入寇。適當其衝。始改縣爲州。卽州治爲鎮。城以固。靖蘭等衛隸之。與寧夏相唇齒。稱重鎮焉。鎮迢遞千餘里。地當四衝。賓客諸酋及海濱生番諸部。迭出剽侵。不能制禦。自臨洮設而西。無海寇之虞。譬援易及。自松山復而北。無靖邊之警。城堡相聯。藩籬既固。堂奧漸安矣。東起蘆溝。抵寧夏石空寺界。西至靖邊。抵臨洮蘭州會寧界。新疆東北大小蘆城塘抵臨洮三眼井界。臨洮衝衝。同原鎮。簾長難及。萬歷二十三年。始設專鎮。關河洮岷。附文成隸之。又拓松山地三百餘里。

屯戍相望。爲金城以南保障。東自會寧抵固原靖邊界。西自宏化寺抵甘肅鎮莊浪界。迤北至松山永秦川邊牆。迤南山黑城子洮民二衛抵四川松茂界。

延綏舊治綏德。據千戶屯治榆林。附近諸衛所官軍輪班哨守。成化初設榆林衛。余都御史子浚復廣衛城。增東西中三路營堡。塹山塹谷。另爲一邊。因移鎮焉。東連牛心之堡。西截河套之衝。包收米脂魚河一帶地三百里。拓土既多。控扼亦要。鎮東由黃市川至定邊營。接寧夏之花馬池。計一千二百里。花馬池北抵橫城三百二十里。橫城亦寧夏堡也。而達諸黃市川。則本鎮邊境共長一千五百二十里。皆在黃河之內。邊牆外悉屬河套。

寧夏邊境東接延綏。西抵固原。計一千八百餘里。繇橫城堡渡河而西。是爲鎮城。繇鎮城之鎮遠關二百四十里。中衛四百里。是在黃河之外。賀蘭紆迴繞之。山之後皆口住牧。又繇鎮城渡河而東。則入靈州。以至韋州三百四十里。韋州南接固原之預望城。又在黃河之內矣。黃河東自臨洮府蘭州經中衛。南過峽口一百里。峽口距鎮城四十里。兩山相夾。河經其中。塞北一勝槩也。河東修設始於巡撫徐廷璋。而楊一清、王瓊、唐龍增築花馬池一帶邊牆。鹽川東西三百餘里藉保障焉。

甘肅鎮所轄漢河西郡地也。國初定河西。秦墩煌。晝嘉峪關爲界。自莊浪歧而南三百餘里爲煌中地。置西甯衛。自涼州歧而北二百餘里爲姑臧地。置鎮番衛。又設甘州等五衛於張掖。設肅州衛於酒泉。蘭州衛於金城。皆屯兵拒守。全鎮幾二千里。惟一線通道。西控西域。南蔽羌戎。北捍胡口。稱孤懸重鎮云。

東自松嶺阿霸嶺抵臨洮雙墩子界。西至嘉峪關。邊長一千八百餘里。境外北有松口流口瓦剌。南有火永海口阿歹諸酋及諸番住牧。

松山東抵黃河。北抵賀蘭。西亘莊浪。南綴蘭靖。延袤千里。國初置郡。隔絕胡口翼護羌夷。實斷匈奴右臂。自款市招引賓會。盤窟其中。棄我三層墩臺。就近築邊。莊浪僅成一線。萬歷二十六年。出兵恢復。剿大小葫蘆塘等處。屬固原。紅水河。三眼井等處。屬洮岷。阿霸嶺。大靖城。土門兒等處。屬甘肅。自黃河索橋至土門。長四百餘里。而蘭靖莊涼俱稱內地云。